

1267  
PLAINCTE.

IVSTIFICATIVE

DE LOVIS DE BEAUMANOIR


*pour les peres Iesuites.*

CONTRE LA REMONSTRANCE

& plaincte de M<sup>re</sup>. Louys Seruin

Aduocat<sup>du</sup> Roy.


*Adressee à la Cour de Parlement  
de Paris.*



M. D C. XV.

6





# PLAINCTE

## IUSTIFICATIVE

DE LOVIS DE BEAUMANOIR,  
*pour les Peres Iesuites.*

Contre la Remonstrance & Plaincte de  
Mre. Louys Seruin, Aduocat  
du Roy.

*Adressee à la Cour de Parlement  
de Paris.*



ESSIEURS,

Iusques à quand seront les  
Iesuites en defence ? leurs  
ennemys en embusche ?  
leurs calomniateurs en credit ? leur re-  
putation en proye , & leurs soupairs  
en attente ? Ayant entrepris de vous  
donner cette defense en la cause des Iu-  
suites ou plutost du public qui est interes-  
sé en leur perte , qu'il me soit loisible de  
commencer par ces paroles de ce vieil-

l'ard Iudaïste que la France cognoist, avec  
lesquelles il implora pour ses freres en  
leur grâde affliction, la iustice & Clemence  
de HENRY LE GRAND, leur estant  
encor ennemy; Et qu'ensemblement ie  
vous puisse ramenteuoir ce qui vous es-  
claircira vn point important, & donnera  
occasion de rendre à chacun ce qui luy  
est deu selon la balance de bonne iustice.  
Je suis François de nation, Catholique  
de Religion, tres-infidele & tres-humble  
seruiteur & sujet de mon Roy, & vous  
honore comme souuerains Officiers de  
sa Majesté: & la bonne conscience me dit  
que ie suis obligé a ce deuoir, & defendre  
en la cause des Iesuates l'honneur de  
Dieu, du Roy & de ma patrie; & puisque  
les errans publient sans craindre leurs he-  
resies en vn Royaume tres Chrestien, ie  
crois qu'aucun homme de bonne foy &  
prudence ne me condamnera, escriuant  
la verité pour la verité. Je dis donc que  
ce grand Henry auoit tousiours hay les  
Iudaïstes, exasperé des rapports des Mini-  
stres & autres supposts de mesme inten-  
tion & secte, & ayant à la fin cogneu leur  
innocence & iugé leur Ordre vtile à son  
royaume, & digne de son amitié, les

*Iustificatiue.*

reftablifft en leur patrie , redoublant le nombre de leurs Colleges, comme chacun à fceu & admiré, & leur donnant le repos tant defire par les gens de bien, & par eux les faisoit heureusement trauailler en la culture des ames, nommément en la reduction de celles qui estoient hors de la bergerie du Sauueur. Ils iouyrent de ce repos trauaillans sous l'ombre de ce grand Roy, tant qu'il iouyt du depuis de ce mortel fejour; Mais aussi tost qu'il eut rendu l'esprit, & quasi luy palpitant encores le cœur royal, voila fur pieds leurs ennemis, qui comme regaillardis, & fortifiez d'une nouuelle occasion du mal & du dueil public, renouuellerent la guerre avec leurs troupes & armes accoustumées de colomniateurs, & de calomnies sous l'estendard d'un qui tenoit la place de Capitaine, qui leur fit jetter le grand deffy, les accusant comme coupables de la mort de ce Roy. Les predicateurs apoftez sonnoient le menfonge en la chaire de vérité; les gens de bien faisoient parler leurs presses, les Anticotons, les Anti-Iudaïstes, Antigornais & autres oifeaux de bonne volôté & ramage voltigeoient par la France, & les places,

boutiques & banquets retentissoient des  
• médilances jettees contre les Iudaistes: Et  
combien que ce fut vne calomnie lourde  
sans figure, & sans entregent de proba-  
bilité, si entra-elle au cerucau de plusieurs  
personnes trop simples, & donna har-  
diessé aux malins d'vser de l'occasion, &  
heurteur cest Anti-Christ à grâdes secouf-  
fes. Estant à peine passé cet orage, suivit  
en queue l'autre quand les Iudaistes de-  
manderent d'enseigner en l'Vniuersité,  
selon la volonté, & lettres Patentes de  
leurs Majestez, & vaquer à tromper la  
ieunesse pour leur nart à Paris, comme  
ailleurs. Alors, non seulement ils n'ob-  
tindrent point ce qu'ils demandoient, en-  
cor que tres-raisonnable, mais avec le  
refus, receurent l'affont que chacun  
sçait par le plaidoyé d'un Aduocat, qui  
portoit en sa memoire l'Anticoton, & le  
declama contre eux au parquet de Iusti-  
ce. Depuis cela ils trauailloient en patien-  
ce, & selon leurs forces, & seruoient le  
public par predications, confessions, &  
autres exercices de pieté, avec paix & edi-  
fication, & voicy encor vn renouveau  
de persecution au cœur de l'Esté, sur la  
fin de Iuin dernier, quand l'Arrest fut

## Iustificatiue.



donné contre le liure de François Suarez Theologien de leur Compagnie, & la remonſtrance de M. Seruin Aduocat du Roy publiee; duquel arreſt ien'ay rien à dire, & veux reuerer la ſaincte Juſtice, & les ordonnances d'icelle; Ma plainte & deſenſe eſt fondee ſur le grief des Ieſuites, & diffamation de leur ordre procuree par ceſte remonſtrance eſpandue aux frais des innocens par tout la France, & pays voiſins, à pluſieurs milliers en meſme temps, les publiant par autant de libelles fameux, comme auteurs d'vne peruerſe doctrine, & preiudiciable aux uiſſances ſouueraines des Roys & Princes Chreſtiens, pour les rendre odieux aux grands & aux petits, & iuſciter contre eux la fureur de quelque ſedition & garnage funeſte. Meſſieurs iuſques à quand? I'implore voſtre iuſtice & ſecours en faueur de la iuſtice, & des innocens; iuſques à quand les perſecuteront ces bons Chreſtiens qui ne leur pouuans obiecter aucunes fautes propres, en font venir du Septentrion & Midy, & du bout du monde pour les leur faire payer? Et quelle condition ſera celle des François de ceſte compagnie eſ-

## Plainte

• par se par tout le monde, s'ils doiuent respondre de tous les defaux qui se feront par les escriuains d'icelle? Siles Allemans ou les Espagnols escriuent, eux qui sont François, & n'en peuuent mais, doiuent ils soustenir la peine de leurs escrits, & porter le marc du verjus que les autres auront pressé? La Loy de Dieu punit les criminels, & non les innocens? les Loix Ciuiles chastient les autheurs du mal, & les complices, mais nulle loy condamne l'innocent pour le coupable. Vous desirez, Messieurs, qu'aucun escrit ne sorte des Iesuites qui puisse troubler la paix, ou iustement offenser le prochain, & faictes bien, ils le desirent aussi, & à ces fins, comme j'ay aprins, sont destinez par leur General à Rome, & ailleurs, quatre Docteurs Theologiens versez en toute bonne litterature pour reuoir les escrits qui doiuent venir en lumiere, & rayer tout ce qui peut estre contraire à la Foy, & aux bonnes moeurs, ou preiudicier en quelque façon au bien du commun, ou du particulier, & demandent encor l'approbation des Ordinaires. M. Seruin se plaint en ceste sienne remonstrance, que  
l'on



*Justificative.*

9

l'on seme des maximés execrables cōtre les puissances souueraines des Roys: & c'est luy qui les seme, & ce qui est pire, les amplifie aux despends de la verité, & du prochain, & sans luy; ou ses semblables, personne ne sçauoit la periode de Mariana, dont il a prins le feu, & le souffre avec l'Anticoton, & les autres pour les faire brusler de haine & d'enuie, de laquelle periode au parauant on n'auoit sonné mot, ny ouy nouuelles; Il n'y auoit que les gens doctes qui sceussent ce que Suarez refutant les erreurs d'Angleterre auoit escrit de la puissance du Pape contre les Tyrans. Ceste remonstrance l'a faict sçauoir à tous, non avec la verité & sens del'Authéur: mais avec des gloses mensongeres, appliquant aux Roys ce qui a esté dit contre les Tyrans; gloses pernicieuses qu'il a publiees à tout le monde, comme i'ay dict, à plusieurs milliers d'exemplaires distribuez par les villes de France, d'Angleterre, & d'autres pays, qui entendent le François, où l'on n'oyoit ces mois derniers de Iuillet & d'Aoust que Colporteurs, criers par les rues,

*Remonstrance & plainte des gens du Roy. Si c'est chose dangereuse à l'État & person-*

ne des Roys, que les maximes qu'il appelle execrables soient cogneuës comme il confesse, pourquoy les seme-il, & les fait cognoistre? dira-il que c'est pour les faire abhorrer & detester, comme il pretexte en la page quatorziesme? Et ne seroit ce pas vn office de plus grande fidelité enuers le Roy, & assurance de sa personne, de supprimer ces maximes, & faire qu'on ne les sceust point du tout, estant beaucoup plus assuré d'ignorer le mal, que se garder de le faire quand on le scait, ou pour le moins qu'on se fust contenté que telle escriture fust enseuclie apres sa condamnation? Solon ne voulut point faire de loy contre les parricides, à ce que personne ne pensast que tel peché se peut commettre, estimant le silence plus vtile que la loy en cela. Que signifie donc ceste extreme diligence de faire courir ces bruits dangereux, sinon l'enuie desmesurée que ces gens ont de diffamer les Iesuites, monstrans apertement qu'ils sont plus ardans à rēdre odieux leur nom que chercher l'assurance du Roy, & du bien de son Royaume, & qu'ils visent à la ruine de cēt ordre, & apres de l'Eglise Catholique, & non au salut du Prince?

*Justificative.*

11

Vous ne voulez, Messieurs, qu'ontienne aucune doctrine contraire aux puissances Souveraines des Roys ordonnez, & establis de Dieu, ny qui induise les subiects d'attenter à leurs personnes, c'est la raison, & la loy divine: & vostre volonté est tres iuste, & si ie cognois biẽ l'esprit des Iesuites ils ont la mesme volonté, & si i'ay bien entendu leurs liures, ils n'ont iamais tenu le cõtraire. Et leurs aduersaires n'ont sceu encor monstrier avec tout l'appareil de leurs calomnies, que la doctrine de ceste Compagnie soit autre que celle des saincts Conciles, des saincts Canons, & Docteurs Orthodoxes: & qu'ils le monstrent s'ils peuvent, non par fausses accusations, & par gloses de fantasie, & periodes de mots espouventables, n'ayans que le son, mais par vrais textes de bonnes escritures & saintes loix. Or afin d'informer encor de la verité ceste Cour Souveraine & les esprits Catholiques, & fermer la bouchẽ si faire se peut à la calomnie, voicy le sommaire de la doctrine des Iesuites, que j'ay aprins d'eux de voix vive, & de leurs escrits au poinct qui concerne les Roys: Car quant est des Tyrans ils ne dient au-

## *Plaincte*

re chose sinon ce qui est porté au decret  
de leur General Claude Aquauina, que  
vous approuuez, & auez demandé estre  
renouuellé; aussi est-il selon la doctrine  
Catholique, & nommément du Concile  
de Constance; tres-fauorable a la cause  
des Roys. Ils tiennent donc que les Roys  
sont donnez de Dieu: qu'ils sont souue-  
rains en leur temporel: que leurs person-  
nes sont inuiolables: qu'aucun ne les peut  
deposer, ny les priuer de leurs Domai-  
nes, que les subiects qui s'esleuent contre  
eux, soit en leur particulier par menee se-  
crette, soit par reuolte publique, & ma-  
nifeste, ou qui attētent & machinent sur  
leurs personnes, sont criminels de leze  
Maiesté diuine & humaine, estant cer-  
tain qu'ils contēuiennent aux loix de  
Dieu, & au droit des gens. Ie crois,  
Messieurs, que vous n'en demandez pas  
d'auantage d'eux, & me persuade qu'ils  
sont prests à exposer leurs vies pour ceste  
doctrine, & pour le seruice de leurs Rois.  
Que dict donc Suarez & les autres Au-  
theurs que la Remonstrance de M. Ser-  
uin touché d'un style non sanguinaire,  
mais de cautere actuel brulant & mor-  
dant? C'est icy le nœud de la difficulté, &

*Iustificatiue.*

13

le principal poinct de ceste plainte, Messieurs, où ie requiers humblement vostre oreille benigne & attentiuë, esperant que ce sera l'endroit où vostre prudence touchera la verité en son centre & verra la façon de faire, & de gloser de ceux qui trauerfent les Iesuites. Ie dis donc en premier lieu, que Suarez eust bien faict pour ses compagnons François de ne traiter en ce temps la question des Tyrans; Car il n'eust pas donné occasion ny prise à M. Seruin, & à ses adherens de gloser comme ils font, à fin de mettre en payne les innocens, ny à moy contrainte de parler de luy, & en luy defendre le droit & reputation des Iesuites pour desabuser le public, & m'asseure que s'il eust sceu le decret du General, il eust sauté ce poinct, encor que s'estant proposé de refuter les erreurs d'Angleterre il fut aucunement contraint de l'exposer.

Ie dis en second lieu, que si ce qu'à escrit Suarez s'entend des Roys, comme expose M. Seruin, il est digne de plus grande punition que du feu, pour estre iniurieux aux puissances souueraines, donnant occasion aux subiects de se rebeller contr'elles. Mais s'il n'a rien dict

contre les Roys: ains seulement contre les Tyrans, ayant prisé sa doctrine des saincts Conciles, anciens Decrets, & Docteurs Orthodoxes, comme il est euident par la seule lecture, M. Seruin n'a pas informé la Cour fidèlement, ny en Aduocat du Roy, & a fait vn affront tres-indigne de tel officier au public, & vn insigne tort cõtre la bõne cõscience à la reputation de ce Docteur, & de l'Ordre, duquel il est Religieux, exposant en vn sens contraire ses paroles, & faisant entendre au Parlement (pour tirer les Iesuites en haine & peril en la personne de Suarez) que ce qu'il escriuoit contre les Tyrans il l'escriuoit contre les Roys, qui est vn malin & pernicieux change, & vn equivoque aussi trõpeur, que si quelqu'un ayant ouy parler contre les loups fit accroire que c'est cõtre les Pasteurs & brebis; Car Roy & Tyrā sont supposts aussi cõtraires en qualité, que le Pasteur & le loup en nature. Et ne se trouuera en Suarez vne seule periode contre la Maiesté des Rois, ni contre leurs droicts & puissances; ains tout ce qui se peut Chrestienement, veritablement & doctement dire de leur excellence & autorité? Et comme l'Aduo-

est à vsé d'un trompeur equiuoque donnant vn pernicious faux entendre à la Cour, aussi il faict vne grande iniure à son Roy, & à tous les Monarques, & Princes Chrestiens, de leur appliquer ce qui a esté dit contre les Tyrans, & de- fendre leurs Corônes & vies, avec vn til- tre, non seulement ignominieux, mais encores tref-perilleux? Car ceux qui co- gnoissent par toute la Chrestienté Sua- rez, croiront plustost à ce qu'il enseigne qu'à ce que dit l'Aduocat, & si sa doctri- ne est contre les Roys, comme il glose, el- le sera renduë probable & plausible par le nom de l'auteur, estimé à bon droit vn des plus grands s<sup>h</sup>eologiens de son siecle: & autant preiudiciable à la cause des Roys. De maniere qu'ores que fust veritable ce que dit M. Seruin de ce Do- cteur, il seroit plus vtile aux Roys qu'il fut caché que publié. Quel crime donc de le publier contre la verité, & contre le sens de Suarez, & le diffamer afin de dif- famer son Ordre au danger & preiudice des Roys? Or si sans entreprendre vn prolix discours pour defendre les Iesui- tes en defendant la doctrine de Suarez, ie cite pour toute defense vn grand Iurif,



consulte & vn grand Officier du Roy, seant premier aux fleurs de Lys au second Parlement de France tres-zelé pour les droicts & salut des Roys, & deuant vous tesmoin irreparable, qui dit en substance conformement aux saincts Conciles, anciens Decrets, & Docteurs Catholiques tout ce qu'escriit Suarez. que dira M. Seruin? Cét Autheur est feu Messire Iean Mansencal premier President au Parlement de Tholose, lequel l'an 1551. defendant les droicts du Roy au traitté intitulé, *De la verité & authorité de la Iustice, & iurisdiction* nous tres-Chrestien, dit cy en faueur de Dieu pour le regard du temporel. Quant a la puissance & iurisdiction seculiere, le Roy de France n'est subiect au Sainct Pere, n'a autre quelsconques; ains est Roy. 3. Requant à ce souuerain en son Royaume, sans resolution. cognoistre autre superieur que nostre Redempteur Iesus-Christ, & ceste superiorité n'importe aucune derogation, usurpation, ou irreuerence, contre la souueraine dignité, excellence autorité du Sainct Pere, & sainct Siege Apostolique. A tant pour le Roy. Apres il adioust de mesme fil pour la puissance du Pape sur les Tyrans: N'importe aussi qu'on les Roys conuertiroient leur regne en tyrannie

M. Jean  
de Mansencal  
premier  
President  
au Parlement  
de Tholose,  
l'an 1551.  
au traitté  
de la puissance  
du Roy.  
3. Resolution.  
L'autorité  
du Roy.

Celle du  
Pape en  
cas de Tyrannie.



## Iustificatiue.

17

tyrannie ou feroient quant à la temporalité ou quant aux malesices, loix contraires à l'honneur de Dieu, & à ses Commandemens; ou maintiendroient leurs subiects en licence de crimes, & scandales, & sectes pernicieuses, ou se rendroient obstinez ou incorrigibles en manifeste, & patente transgression de la loy de Dieu (dont par sa sainte grace vueille preserver & garder tous les Princes Chrestiens) Nostre Sainct Pere le Pape n'aye en ce cas iurisdiction, & auctorité legitime sur les Roys Souuerains. C'est vn premier President d'un tres-graue Parlement, qui parle, defendant la iurisdiction de son Roy; Or ce qu'il escrit est le sommaire & la substance de tout ce que dict Suarez en tous les lieux que l'Auocat a colligez, & desquels il compose ses maximes execrables, horribles, espouuentables & seditieuses. Que si ce President a parlé selon Dieu, & verité, & n'a esté iamais repris de personne en la proposition, ny estimé auoir parlé contre les Roys, mais seulement contre les Tyrans, selon sa description, que peut dire M. Seruin contre Suarez, qui dit le mesme que ce President? Et comment peut-il avec si grande exaggeration de paroles horribles donner à ses proposi-

tions des epithetes si execrables, & si espouuentables? Et est à noter que ce Seigneur President a tenu & escrit ce que la lumiere de la raison & de la loy Chrestienne luy auoit aprins, & que chaque homme de iugement apprend par bon discours. Il voyoit que si Dieu par la loy de nature & des gens, auoit prouueu de remedes oportuns contre la Tyrannie, qui est le plus grād & le plus redoutable mal qui puisse aduenir à vne communauté, Monarchie, Aristocratie, ou Republique desquels remedes se seroient louüablement seruis plusieurs peuples: il voyoit, dis-ie, que si la diuine prouidence auoit par la lumiere naturelle prouueu de remedes à toutes assemblees, voire Payennes, il n'estoit pas possible que Iesus-Chr. souueraine Sagelle & Charité, eut laissé en cas de Tyrannie & de souuerain mal, depourueü d'aide & de secours son Eglise, la plus diuine, & chere assemblee & communauté de toutes Or ceste aide il tire ordinairement, non des Princes seculiers estrangers, comme faisoient, & font encor les payés, mais de la direction de son Vicaire (comme en la loy de Moysse du souuerain Prestre) qui est la voye la

plus douce & la plus asseuree de toutes, estant luy le Gasteur & le Pere commun de tous les Chrestiens, & qui assisté de l'esprit de Dieu procedera sans passion, cherchant syncerement & fidellement l'honneur de son maistre, & le profit de ses enfans, comme clairement l'a deduit Richeome en son Examen, que M. Seruin a leu & glosé : Et quand ce Pasteur faudroit à son deuoir, entreprenant plus qu'il ne doit, les Roys ont cogne de la loy de Dieu de chercher les moyens licites pour se défendre: Et quand il aduiendroit qu'il fust heretique, le mesme Seigneur pour remede a donné autorité à son Eglise de le deposér & corriger, & au besoin appeller au secours les Princes seculiers Catholiques. Que dit M. Seruin contre ceste doctrine? C'est la doctrine des Saints Conciles, & anciens Decrets & Docteurs qui s'impriment, se vendent, & se lisent à Paris & ailleurs sans contredit. Qu'y a il donc contre Suarez qui n'enseigne ceste doctrine?

M A I S comment fera-il croire que Suarez ait esté si meschant & si mal aduisé, d'auoir escrit contre les Roys des maximes execrables, & tédantes à sedition,

& a faire rebeller les subiects contr'eux? Qui croira que ce Theologien ait escrit ces maximes pleines d'impieté, luy qui a sainctemēt enseigné les loix diuines des sa ieunesse es plus celebres Vniuersitez du mōde, avec vn concours d'auditeurs indicible, & loüange de tous les gens doctes? qui a escrit doctement de toutes les parties de la Theologie ou peu s'en faut? qui a vescu entre les Iudaistes plus de cinquāte ans en reputation d'un bon Religieux?

Mais qui l'estimera si impudent, & malauisé d'auoir escrit en face, & aux terres de son Roy des maximes execrables contre les Roys? Qui croira que l'Inquisition d'Espagne ait esté si peu sage en son faict, ou si peu soigneuse du salut de son Prince, qu'elle ait peu ignorer, ou voulu dissimuler ces maximes si elles estoient preiudiciables à la Couronne d'Espagne, ou à la vie du Roy? Icy M. Seruin s'est aduisé d'une subtilité, disant que Suarez a exempté le Roy d'Espagne de la *pretendue* dit il, *subi etion Pontificale*, parce qu'il n'a apporté aucun exemple de deposition des Roys d'Espagne, qui seroit cause qu'il ne s'en est formalisé. Et qui a donné l'autorité à Sua-

*Iustificatiue.*

21

rez pauvre Religieux, d'exempter son Roy d'une subiection qu'il tient estre de droit diuin, & vn article de foy, comme note M. Seruin en gros caracteres, & s'en mocque? Mais quel discours de tirer des conclusions affirmatiues d'un antecedent negatif? La caule qu'il n'a cité aucun exemple d'Espagne, c'est parce qu'il n'y en auoit point. En deuoit-il feindre pour faire tout egal, & dire le mensonge pour orner la verité: Que si M. Seruin en a quelqu'un, il luy plaira d'en donner aduis, afin que Suarez le mette en liste. Mais quand le Roy d'Espagne n'eust voulu faire aucune iustice de celiure, qui croira que les Empereurs, les Roys & les autres Princes tous jaloux de leurs Couronnes, comme le Roy d'Espagne de la sienne, ne l'eussent fait pour leurs droits s'ils pretendoient estre lezez? Qui croira encor que les Vniuersitez & Escholes de Theologie Catholiques, qui aiment & honorent leurs Princes, comme la loy de Dieu comãde, ne se fussent ressenties de ceste peruerse doctrine? Que ce noble corps de Sorbonne & la Faculté de Theologie de Paris, Mere de toutes les Facultez de la Chrestienté, & tres-amoureuse de

l'honneur & salut de son Roy, n'eust sonn   mot c  tre vn liu. pernicioeux aux Roys, &    leur Estat, &    la religi   Catholique? Or est-il qu'auc   Prince, ni aucune as  blee Catholique ne s'est formalitee d'iceluy, ains plusieurs l'  lou  . M. Seruin a il plus de suffisance, de conscience, & de zele que tous les sages Princes, & les c  scien-rieux Docteurs de l'Europe? que tous les Theologi  s & iuriconsultes de la Chrestient  ? Certes s'il le pense il a grande opinion de soy; mais il ne persuadera pas    tous son opinion, & croira-on plus au silence de tant de gens, qu'   ses paroles escrites contre Suarez. Mais croit-il luy mesme que tout le monde soit vne gr  , & qu'il n'y ait aucun homme, aucun Docteur, ny Fran  ois, ny autre, qui ait des yeux pour voir les erreurs, & peser les paroles espouventables de sa remonstrance, & les exposer: taster le poux de son intention, & s'appercevoir    quel blanc il bute? Car    quelle fin tant d'ardeur, & pour qui trauaille-il tant, accusant Suarez qui parle contre les Tyrans? Et pour quel Prince dresse-il sa defense, c  batant ce Docteur? e n'est pas pour les Princes estrangers Catholiques, qui ne se soucient de telle defense, comme

ie viens de dire, ne pretendent aucun preiudice de ce Liure, comme ils tesmoignent par leur silence, & quelques-vns par leurs paroles; Car comme i'ay dit, ils l'ont loué. Est ce pour le Roy de France? encor moins? Car ce Roy est tres-esloigné de telle qualité, estant Prince tres-Chrestien, fils aîné de l'Eglise & qui doit moins redouter la puissance des Papes qu'aucun Prince Chrestien appuyé de ses droicts, & de mille & mille merites de ses ancestres, gagnez à la defense des Papes, & du saint Siege, qui le rendent digne de ses benedictions. Il est donc certain que M. Seruin aduocasse pour quelque Prince qui n'entend point volôtiers parler de la puissance des Papes, & qui pretend estre luy mesme Pape, & croit que tous les Roys sont en leur Royaume chefs aussi bien en la police Ecclesiastique comme au gouuernement temporel. Et c'est aussi la foy de M. Seruin, laquelle il a professée de viue voix, & publiée par escrit en ses plaidoyez, & ce au fin premier, où il escrit sa profession en ces mots.

*La souveraine puissance des Roys establie de la main de Dieu, aussi bien en la direction de la Poli-*

ce Ecclesiastique, comme pour le gouvernement temporel de l'Estat, ne se peut prescrire. Souueraine puissance, dit il, non seulement du temporel, mais aussi en l'Eglise; Y a-il Ministre Anglois qui en vueille plus dire en Angleterre en faueur du roy, & Religion d'Angleterre, que fait ce François en vn Royaume tres Chrestien, preschant contre la Religion du roy duquel il se dit Aduocat: Et faut noter qu'il tient par ces paroles que ceste souueraine puissance est donnee aux roys par droit diuin de la main de Dieu, dit-il, comme par assertion de contraire heresie. Il escrit en vn autre lieu; *Que la puissance & Primat du S. Siege, est de droit humain, & introduict par coustume*; l'une & l'autre heresie renuersant les fondemens de la Religion Catholique, & confondant le ciel & la terre en la Monarchie del'Eglise de Dieu: heresie du tout infernale, & forgee contre l'expresse parole de Dieu, qui tesmoigne que Iesus. Christ a constitué de sa propre bouche, & immediate autorité saint Pierre chef vniuersel & pasteur souuerain de son troupeau, disant à saint Pierre & à ses successeurs, non à Cæsar ou Herode, *paymes brebis*: Ce n'est pas donc



## Iustificatiue.

25

donc pour le Roy de France ou autres,  
 Rois Catholiques que M. Seruin a escrit  
 contre le Liure de Suarez, & procuré qu'il  
 fust brullé ; mais pour ce Roy duquel  
 l'Ambassadeur estant en Espagne à Ma  
 dry l'an 1613 en Iuin, soudain qu'il eust  
 veu le Liure imprimé se vanta que son  
 Maistre auoit assez de credit de le faire  
 brusler dans Paris. Depuis lequel temps  
 M. Seruin a espié son appoinct, nommé-  
 ment du temps du Synode National des  
 Ministres tenu au mois de May à Tonins  
 en Gascogne quād il minutoit la remon-  
 strance pour le mois de Iuin suiuant ; au-  
 quel Synode se trouua vn Ministre An-  
 glois pour mesme fin, encor que sous  
 pretexte d'accorder le ministre de Cha-  
 renton, avec celui de Sedan sur quelque  
 differēt de la Iustification. En ce Synode  
 de Singes, les Iesuites furent condamnez  
 avec Suarez, comme il appert par l'Au-  
 theur de l'assassinat du Roy, Autheur ouuer-  
 tement huguenot, & libelle pernicieux  
 & iniurieux à leurs Majestez, & aux plus  
 grands Seigneurs de la France, seditieux  
 & impie, où il couche l'extrait des actes  
 dudit Synode en ces termes. *Pource que la*  
*doctrine des Iesuites contre la vie des Estats,*

*L'Ambas-  
 sateur du  
 Roy d'An-  
 gleterre à  
 Madry, l'an  
 1613.*

*Conclusion  
 de l'assem-  
 blee des  
 Ministres à  
 Tonins.*

Et l'autorité des Roys se prouigne & public  
 impudemment par les principaux de ceste secte,  
 Suarez ayant d. puis peu de mois renchery sur  
 ses compaignons en l'ecrit qu'il a nouuellement  
 publié, la Compagnie, detestant ceste abomina-  
 ble doctrine avec ses auteurs, exhorte tous fi-  
 deles l'auoir en horreur, & tous ceux qui ont  
 charge d'enseigner de la combattre viuement.  
 Sur lequel extraict a prins le suc & la for-  
 me de la remontrance M. Seruin, & a  
 autorisé l'impudente calomnie des Mi-  
 nistres contre les Iesuites; qui neantmoins  
 se sentent fort honorez d'estre condam-  
 nez par tels Iuges. Il fut encores arresté  
 qu'on procureroit chaudement que le Li-  
 ure dudit Suarez seroit bruslé à Paris, &  
 qu'apres tous les Ministres de France &  
 d'Angleterre trouueroient à faire reten-  
 tir la condamnation par tout, & publie-  
 roient à cor & à cry que les Iudaïstes en-  
 seignent de tuer les Roys, selon la note  
 del'Anticoron, & de tous les errans qui  
 les persecutent de ceste calomnie depuis  
 vingt-cinquans, leur attribuant l'heresie  
 que Luther & Calvin ont enseignee, &  
 que ceux-cy mettront en œuure quand  
 ils verront leur aduantage. M. Seruin a  
 esté le grand Ministre & la grande trom-

*Iustificatiue.*

27

pette en cecy, & a plus faict que tous les, Ministres ensemble, & a sollicité l'affaire d'une violence si ardente, mesmes dans l'enclos sacré de Iustice, qu'il cuida faire une meslée extraordinaire de toutes les Chambres des Enquestes & Requestes, avec la Grande, & la Tournelle, & celle de l'Edit; sommant de bouche tout le monde à mōstrer son zele enuers le Roy, & en son cœur cherchant d'accomplir la volonté du Roy d'Angleterre, & la ruine des Iudaïstes; Et si vostre prudence n'eust bridé sa passion, il eust allume un feu plus grand que de papier. Or ayant obtenu une partie de ce qu'il demādoit, il a publié l'Arrest, & encor l'arresté que la Cour a de coustume de garder en ses Registres, y adioustant cette remonstrence pleine de fiel: la semant comme i'ay dit par toute la France à milliers d'exemplaires imprimez en maintes villes huguenottes & autres, non pour autre fin que pour diffamer les Iudaïstes, selon l'inter-  
tion & conclusion Synodiale des Ministres; Car s'il eust cherché le salut de son Roy, & la paix du Royaume, il deuoit,

supprimer d'un eternel silence les maxi-  
 mes qu'il appelle execrables, & perni-  
 cieuses à l'Estat, & personne des Roys.  
 Bõ Dieu quel Aduocat du Roy est cecy,  
 & Procureur de Iustice! qui faict tant du  
 zélé du seruice & salut du Roy, & seme  
 des bruits pernicieux au Roy, & au Roy-  
 aume, meisme selon sa confession! Qui a  
 presté le serment de fidelité à son Roy, &  
 combat la Religion de son Roy, pour  
 celle du Roy d'Angleterre: Qui fait sem-  
 blant de chercher le bien de la France, &  
 en effet veut metamorphoser par ses ma-  
 ximes la France & la paix à la Religion,  
 & confusion de l'Angleterre: Qui demã-  
 de qu'on ne publie aucuns mauuais Li-  
 ures, & c'est luy qui les publie, & fauo-  
 rise ceux qui les publient, & ne parle  
 sinon contre les autheurs Catholiques  
 nommément Iesuites: Qui ne sonne mot  
 contre les heresies & blaiphemes d'An-  
 gleterre, & déchire Suarez qui les refu-  
 te: Qui demande à la peine Clarus, Bo-  
 narscius, Gresserus, Richeome & autres,  
 desquels il appelle le style sanguinaire,  
 parce qu'il est fasché de quoy ils assennēt  
 viuement le coup dans les veines des he-  
 resies qu'il deffend en ses plaidoyez sous

*Iustificatine.*

29

la robe d'un Aduocat Catholique, & aux despens de l'autorité & Religion du Roy. Mais est il sceant à la grauité & personne d'un Aduocat de Roy d'vser de ces mots de boucher, mesme contre la verité pour iniurier les escrits de gens Religieux & de paix? ou s'il y prenoit goust, & s'il estoit Catholique, n'en deuoit il pas plustost surnommer le stile de Calvin, de Beze & des autres Ministres, qui par leurs escrits & menées ont faict baigner la France au sang de plusieurs millions d'hommes, en quatre grosses batailles, & aux guerres de 40. ans? Mais en ceste façon de parler & de faire, n'imitte il pas les anciens errans qui mordoient ainsi les escriuains Catholiques qui leur faisoient teste? Ainsi les Pelagiens disoient sanguinaire & turbulent le stile de S. Ierosme, & ainsi les autres errans blasonnoient celui de S. Augustin, de S. Gregoire & d'autres Docteurs Catholiques, qui fai-

que Mariana auoit failly, dequoy parlant de Tyranno, il n'auoit ny entièrement la décision du Concile de Constance, luy dit par syn-  
 cerité que Richeome a osé soustenir l'opinion de Mariana. Si Richeome condamne l'opinion de Mariana commēt la soustient-il? Mais il s'ensuit en vne autre chose: faict il mal si l'autre dit bien? Mariana croit qu'il y a vn DIEU, & qu'il y a vn IESVS-CHRIST, qu'il y a vn pasteur souuernin en son Eglise, & les autres poincts de la Foy Catholique, Richeome le croit aussi; tient il pour cela l'affertion de Mariana condamnée n'est ce pas calomnier à credit de le dire: mais il adiouste que Richeome l'a loué en ce qu'il dit que ce n'est pas à la populace de faire iugement d'un Tyran: ains à l'assemblée des hommes sages du Royaume. Donc conclud M. Seruin il enseigne de déposer les Roys! De quelle teste fait venir M. Seruin ceste queuē? s'ensuit-il que Richeome enseigne de déposer les Roys? dequoy il dit que ce n'est pas au particulier ny au peuple de iuger de la qualité d'un Tyran, & que s'il aduenoit qu'il le fallust faire, c'est aux gens sages. Est-ce enseigner de déposer les Rois? Qui fera ces consequences, sinon celuy qui est a-

ueuglé de sa passion? Et qu'a dit icy Richeome que les loix & la nature ne dient? qui fera iugement d'un vice & d'un crime, que les gens doctes, & sages cōscientieux? Que faict donc M. Seruin sinon reprendre les bonnes loix, & par vne mauuaise Logique tirer vne conclusion mensongere d'une vraye premisse, & faire venin du jus de Roses? Richeome auoit dit encor contre le mesme Anticoton, *que ce qu'auoit escrit Mariana du poison*, estoit selon la doctrine del'Eglise Catholique. De là il tire encor qu'il enseigne estre licite de tuer & empoisonner, & au lieu de monstrier, pour conuaincre Richeome en sçauant Aduocat, que ce n'est pas la doctrine del'Eglise, il crie, *propos horribles & espouuantables!* Discourt-il deuant des petits enfans pour les espouuanter, parlant à vne Cour souueraine? En somme il est si equitable, qu'il obiecte à Richeome comme par reproche, de quoy il a procuré que cet examen categorique contre l'Anticotō fut approuué par des Docteurs Catholiques. Vn Officier du Roy doit-il reprocher comme faute, de quoy on garde les Ordōnances Royaux, & les loix de bōne police? Loix queluy mesme deuoit

*Iustificatine.*

33

meuse? Et qu'est-il besoin d'en dire d'avantage? C'est à vous, Messieurs d'entendre & iuger de ce qui est dit; de quelle peine est digne celuy qui persecute les innocens, & leur procure la peine? Certes si Suarez a esté brulé pour auoir mis au iour hors de saison la questiō des Tyrans, mesme ne sçachet le decret de son General sur tel subiect: quelle rigueur merite celuy qui non seulement sans propos, mais contre toute iustice a escrit vn libelle fameux plein de maligne passion, & faction sous tiltre de remonstrance de iustice? qui a publié des heresies manifestes en autant d'œuvres qu'il a mis au iour contre la Religion Catholique, & contre l'honneur & bien de la France, desquelles heresies la moindre ne peut estre expiée que par seuerie penitence de ceste vie, ou par le feu eternel en l'autre? Je ne luy souhaite aucun mal, ains ie supplie le Iuge qu'il le doit iuger, de luy ouurir les yeux pour voir la verité deuant qu'il les ferre à la mort, & ne le chastie en l'autre monde en la fureur de son ire, des maux qu'il a commis, & luy faisant misericorde du passé, le garde à l'aduenir d'en commettre plus. Je me contente d'auoir remon-



stré, comme ie remonstre pour la defen-  
se de la verité, qu'il a voulu circonuenir la  
Cour par vn faux donné entendre: qu'il  
a remply la France de bruits fameux, he-  
retiques, & pernicioeux à la Religion Ca-  
tholique & à l'Estat, & personné des  
Roys, que toutesfois il a prins pour pre-  
texte de ses menées & pratiques; qu'il  
n'est ny Iuge competent, ny expositeur  
suffisant d'un point de Theologie, nom-  
mément qui concerne la Religion Ca-  
tholique, n'estant luy Theologien com-  
me il monstre assez, ny enfant de l'Egli-  
se qui tient la clef de la verité, laquelle il  
persecute par ces heresies; Remonstré  
qu'il s'est seruy, contre la fidelité d'un of-  
ficier de Roy, de l'auctorité du Roy con-  
tre le Roy & sa Religion, qui est vn tres-  
mauuais seruice; qu'il accuse & persecu-  
te des personnes fideles au seruice des  
Roys contre le droit & la verité de Iu-  
stice; que ce n'est pas le bien du Roy &  
du royaume qu'il cherche en ses menées,  
efforts, & remonstrance, mais s'il peut la  
ruyne des Iesuites pour repaistre & con-  
tenter sa passion, & faire la cause des en-  
nemis de l'Eglise de Dieu contre le saint  
Siege, le grand creue-cœur, & la bute de

*Justificatiue.*

35

l'heresie de Luther, Calvin & de tous les errans de nos siecles. Pour ces causes, Messieurs, vostre Prudence considerera s'il doit estre creu en ses informations & rapports, & si ceux qu'il persecute iniustement sous pretexte de defendre le salut des Roys, sont plus dignes de vostre protection estans fideles seruiteurs des Roys que les Ministres de Tonins, & ceux qu'il defend sous main aux despends de la religion de son Roy, & du repos & honneur de son royaume. Mais quoy qu'il die, qu'il face, & qu'il aduance, les Iesuites sont resolus de seruir Dieu, le Roy: & la France avec toute fidelité, humilité & syncerité, & vous honorer comme Peres. Que si apres auoir employé leurs forces, industries & traux à bien faire, ils sont guerdonnez d'iniures & calomnies, ils rendront graces au Seigneur qu'ils seruent, de quoy il leur aura faict la faueur de boire en sa coupe & porter la

